

PN aprova proposta-lei OJE 2023 biliaun \$3,16 iha final global

DILI, 17 novembru 2022 (TATOLD)—Parlamentu Nasionál (PN) liuhosi reuniaun plenária, sesta ne'e, aprova proposta lei número 46/V(5a) Orsamentu Jerál Estadu (OJE) 2023 ho montante biliaun \$3,16 iha final global ho votu a-favor 42, kontra 21 no abstenção rua (2).

“Siginifika proposta-lei Orsamentu Jerál Estadu (OJE) 2023 aprova,” Prezidente PN, Aniceto Longuinhos Guterres Lopes, fó sai iha sala plénaria PN.

Enkuantu, proposta OJE 2023 ho montante biliaun \$3,16 kompostu hosi orsamentu administrasaun sentral biliaun \$2,8 (montante ne'e inklui ona Fundu Kombatente Libertasaun Nasionál, biliaun \$1), orsamentu seguransa sosial hetan alokasaun millaun \$235,7 no RAEOA millaun \$120.

Orsamentu ne'e sei uza hodi finansia programa 45 liuhosi atividade prinsipal 275, organizadu iha área estratéjiku 16 ne'ebé Governu sei foku ba iha tinan oin hanesan agrikultura, pekuária, peska no floresta, ekonomia no empregu, turizmu, desenvolvimento rural no abitasaun, ambiente, petróleo no mineral, eletricidade no enerjia renovável, konektividade nasional, bee no saneamentu, edukasaun no formasaun, saúde, inkluzo no protesaun sosial, kultura no patrimóniu, reforma Estadu, defeza no seguransa nasional, relasona internacional no política esterna.

Proposta OJE ba tinan oin, VIII Governu Konstitusionál prepara ba dahuluk bazea ba regra orsamentál foun aprova hosi Lei Enkuadramentu Orsamentál.

Proposta orsamentu ne'e kontempla ona orsamentu tuir programa no alokasaun orsamentu ba prioridade nasional ne'ebé mak define ona iha lei grande opsaun planu 2023.

Proposta ne'e mai ho lema investimentu produtivu no 'kresimentu inkluzivu ba jersaun futuru' apresenta distribuisaun rekursu nasional ne'ebé justu no ekuitativu hodi mellora prestasaun serbisu, rekuperasaun ekonómiku no reziliénsia, promove kresimentu ekonómiku ida-ne'ebé inkluzivu no sustentável iha mediu prazu.

Proposta OJE ne'e Governu aloka millaun \$17 ba konstrusaun, reabilitasaun no manutensaun estrada no ponte sira iha área rural, millaun \$15 ba konstrusaun estrada nasional Pante Makasar, millaun \$7,8 ba reabilitasaun estrada munisipal entre Laga no Baguia hamutuk kilometru 30, inklui mós iniciativa sira seluk ho intensaun atu kontinua implementa programa konstrusaun estrada, ponte no ligasaun rede elétrica nasional iha território laran tomak.

Atu garantia katak to'o iha 2030 populasun sira hotu iha rai-laran iha asesu ba eletricidade nasional ho presu ne'ebé baratu no enerjia renovável ho eskala kiik liuhosi EDTL, iha proposta orsamentu ba tinan oin, Governu aloka ona millaun \$118.

Iha tinan oin, Governu mós aloka ona orsamentu millaun \$25 hodi aselera diversifikasaun ekonomia, millaun \$14,5 investe iha setór telekomunikasaun, millaun \$6,4 hodi promove produsaun nasional, millaun \$2 aloka ba kriaun balkaun úniku ba rejistu empreza no millaun \$1,3 hodi harii parke indústria.

Governu mós investe millaun \$21 iha setór agrikultura atu apoiu aumentu produsaun no produtividade ne'ebé sustentável ho intensaun atu redus pobreza, hasa'e seguransa alimentár no promove kresimentu ekonómiku iha área rural.

Millaun \$3,6 ba sistema irrigasaun Laivai no millaun \$2,6 ba Galata, no apoiu estensaun área agrikultura ho orsamentu alokadu millaun \$2,6 no millaun \$2,1 hodi desenvolve zona agrikultura integradu iha área irrigasaun.

Kapital sosal hetan alokasaun millaun \$772

Distribuisaun tetu agregadu orsamentu administrasaun sentral iha OJE 2023, setor kapital sosal ne'ebé inklui saude, edukasaun no protesaun sosal hetan alokasaun millaun \$772 ka 36%, setor ida-ne'e mak maior benefisiariu hosi finansiametu proposta OJE 2023.

Ida-ne'e refleta importansia ne'ebé mak Governu fo ba iha asesu universal ba edukasaun ne'ebé kualidade millaun \$137, saude millaun \$92 no protesaun sosal millaun \$301, liu-liu ba grupu vulneravel.

Governu propoin ba Parlamentu Nasionál orsamentu ho montante millaun \$19,2 hodi implementa programa Bolsa da Mãe, hosi montante ne'e millaun \$5,3 sei aloka ba kontinuasaun programa inisiu no millaun \$13,7 sei aloka ba espansaun Bolsa da Mãe Jerasaun Foun, ne'ebé nia objetivu mak atu apoiu inan isin-rua no mellora saude no nutrisaun durante inisiu loron rihun-ida nomós apoiu labarik ho moras kroniku no defisiensia.

Programa nutrisaun hetan alokasaun millaun \$10

Iha Proposta OJE ne'e Governu propoin programa nutrisaun millaun \$10, ida-ne'e representa aumentu *quatro vezes* ka pursentu (400%) kompara ho orsamentu alokadu ba programa nutrisaun iha OJE 2022.

Proposta OJE ne'e mos kobre alokasaun orsamentu millaun \$22,4 hodi espande programa merenda eskolar, mellora kualidade hahan hodi alkansa labarik sira nia kualidade nutrisaun, hasa'e despeza ba kada labarik no kada hahan husi \$0,25 to \$0,42.

Proposta OJE ne'e formula bazeia ba objetivu estratejiku hosi Governu ne'ebé nia objetivu atu fornese sidadaun sira oportunidade atu iha moris saudavel, seguru no moris naruk, asesu ba kuiñesimentu, teknolojia no inovasaun, no asesu ba rekursu suficiente hodi garantia vida moris ida-ne'ebé dignu.

Introdusaun impostu iha proposta OJE 2023

Liuhusi proposta OJE ne'e Governu propoin ba Parlamentu Nasionál atu hasa'e impostu seletivu konsumu foun ne'ebé inklui; 10% impostu ba karreta ho valor liu \$10.000, 20% ba karreta ho valor liu \$25.000, 30% ba karreta ho valor liu \$50.000.

No aumentu iha impostu konsumu ba tabaku no produ tu tabaku seluk hosi \$50 kada kilograma sa'e ba \$100 kada kilograma.

Impostu konsumu foun \$1.00 kada kilograma ba masin-midar, introdusaun impostu konsumu foun ho valor \$3 kada litru ba bebida asukarada hanesan fanta, kokakola, sunkist, sprite no seluk tan, ida ne'e Governu introdus atu proteje sidadaun sira nia saude publiku.

Aleinde ne'e, Governu mos propoin atu hasa'e impostu importasaun hosi 2,5% ba 5%.

Liuhusi introdusaun impostu hirak ne'e, Governu halo projesaun katak reseita domestikika sei sa'e husi millaun \$153,7 iha 2022, ba millaun \$174,9 iha 2023.

Introdusaun impostu hirak ne'e sai nu'udar instrumentu fiskal ida-ne'ebé Governu uza atu hasa'e koleksaun reseita domestikika iha tinan hirak tuir mai hodi redus dependensia ba fundu mina-rai.

Medida hirak ne'e mos aliña ho politika reforma fiskal no jestaun finansa publiku no reforma importante ida-ne'ebé inisia ona hosi sestu Governu iha 2015 no VIII Governu Konstitusionál komprometidu atu kontinua implementa.

Parlamentu Nasionál Aprova iha Finál Globál Proposta OJE 2023 ho votu A favor 42

Ministro das Finanças, Rui Augusto Gomes iha Facebook. 17 Novembru 2022

Díli, 17 Novembru 2022 – Parlamentu Nasionál liuhusi sesaun Plenária iha loron ohin, aprova ona iha finál globál Proposta Orsamentu Jerál Estadu 2023 ho montante totalí billiaun \$3,16 ho votu a favor 42 (64%), Kontra 21, no Abstensaun 2.

Totalí despesas globál billiaun \$3,16 ne'e kompostu husi Orsamentu Administrasaun Sentrá biliaun \$2,8 (montante ne'e inklui ona Fundu Kombatentes Libertasaun Nasionál, billiaun \$1). Orsamentu Seguransa Sosiál hetan alokasaun millaun \$235,7 no RAEOA millaun \$120.

Proposta OJE 2023 mak Primeira Proposta OJE ne'ebé Oitavu Governu Konstitusionál prepara bazeia ba regras orsamentál foun aprova husi Lei Enkuadramentu Orsamentál. Proposta Orsamentu ne'e kontempla ona Orsamentu tuir Programa no alokasaun orsamentu ba prioridade nasional ne'ebé mak defini ona iha Lei das Grandes Opções do Plano 2023 ne'ebé mak promulga husi Prezidente República, José Ramos Horta iha fulan juñu liubá.

Proposta ne'e mai ho lema "Investimentu Produtivu no Kresimentu Inkluzivu ba Jerasaun Futuru" – apresenta distribuisaun rekursu nasional ne'ebé justu no ekuitativu hodi mellora prestasaun servisu, recuperasaun ekonómiku no reziliénsia, promove kresimentu ekonómiku ida ne'ebé inkluzivu no sustentavel iha mediu prazu.

Proposta OJE 2023 ne'e dezeńa bazeia ba Objektivu Estratejiku husi Oitavu Governu Konstitusionál ne'ebé nia objetivu atu fornese sidadaun sira: 1) Oportunidade atu iha moris saudável, seguru no moris naruk; 2) Asesu ba konesimentu, teknolojia no inovasaun; no 3) Asesu ba rekursu suficiente hodi garantia vida moris ida ne'ebé dignu.

Iha Proposta OJE 2023, Governu propoin ba Parlamentu Nasionál atu hasa'e impostu seletivu konsumu foun ne'ebé inklui:

- ◆ 10% impostu ba karreta ho valór liu US \$10.000
- ◆ 20% ba karreta ho valór liu US \$25.000
- ◆ 30% ba karreta ho valór liu US \$50.000
- ◆ Aumentu iha impostu konsumu ba tabaku no produktu tabaku seluk husi US \$50 kada kilograma sa'e ba US \$100 kada kilograma.
- ◆ Impostu konsumu foun US \$1.00 kada kilograma ba masi-midar.
- ◆ Introdusaun impostu konsumu foun ho valór US \$3 kada litru ba bebida asukarada (Fanta, Coca-Cola, Sunkist, Sprite no sst). Ida-ne'e Governu introdus atu proteje sidadaun sira nia saúde públuku.

Aleinde ne'e, Governu mós propoin hodi hasa'e impostu importasaun husi 2,5% sa'e ba 5%.

Liuhusi introdusaun impostu hirak ne'e, Governu halo projesaun katak reseitas doméstika sei sa'e husi millaun \$153,7 iha 2022, ba millaun \$174,9 iha 2023.

Introdusaun impostu hirak ne'e sai nu'udar instrumentu fiskál ida ne'ebé Governu uza atu hasa'e koleksaun reseitas doméstika iha tinan hirak tuir-mai hodi redús dependénsia ba Fundu Minarai.

Medidas hirak ne'e mós aliña ho Polítika Reforma Fiskál no Jestaun Finansas Publikas – agenda Reforma importante ida ne'ebé inísia ona desde 2015 no Oitavu Governu Konstitusionál lideradu husi Primeiru-Ministru, Jenerál Taur Matan Ruak komprometidu atu kontinua implementa.

Sesaun Plenária ne'e prezide husi Prezidente Parlamentu Nasionál, Aniceto Longuinhos Guterres Lopes, akompaña husi membrus Meza Parlamentu Nasionál ho prezensa husi Primeiru-Ministru, Jenerál Taur Matan Ruak, Ministru Finansas, Rui Gomes, inklui Membrus Oitavu Governu Konstitusionál. Ministru Finansas no Vise-Ministru Finansas hetan akompañamentu husi Diretores-Gerais, Diretores-Gabinetes, Diretores-Nacionais no Tékniku sira husi Ministériu Finansas. ***